

五

倫

書

五倫書卷之二十一

君道

善行

命將

虞舜以有苗弗率。命禹徂征。禹乃會羣后誓于
師曰。濟濟有衆。咸聽朕命。蠢茲有苗。昏迷不
恭。侮慢自賢。反道敗德。君子在野。小人在位。
民棄不保。天降之咎。肆予以爾衆士。奉辭伐
罪。爾尚一乃心力。其克有勲。既而苗民逆命。

禹遂班師振旅。帝乃誕敷文德。舞干羽于兩階。七旬有苗格。

夏仲康肇位。羲和廢厥職。王命胤侯徂征。胤侯乃告于衆曰。羲和顛覆厥德。沉亂于酒。畔官離次。傲擾天紀。遐棄厥司。今予以爾有衆。奉將天罰。爾衆士同力王室。尚弼予欽。承天子威命。

周宣王時。蠻荆背叛。王命方叔伐之。故詩人詠之曰。顯允方叔。征伐玁狁。蠻荆來威。言其嘗

與北伐之功。是以蠻荆聞其名而皆來畏服也。

列國秦武王使甘茂伐韓。茂曰。宜陽大縣。其實郡也。今倍數險行千里。攻之難。魯人有與魯參同姓名者。殺人。人告其母。母織自若。及三人告之。母投杼下機。踰垣而走。臣賢不及參王之信。臣又不如其母。疑臣者非特三人。臣恐大王之投杼也。今臣羈旅之臣也。樗里子。公孫奭挾韓而議。王必信之。王曰。寡人弗信。

乃盟于息壤。茂伐宜陽五月而不克。二人果
譖之。武王召茂。欲罷兵。茂曰。息壤在彼。王乃
悉起兵佐茂。遂拔韓。

漢高祖王漢中時。欲還兵東擊項羽。乃用蕭何
言。設壇具禮拜。韓信為大將。既拜禮畢。引信
上坐。問曰。將軍何以教寡人。信因言項王所
過無不殘滅。百姓不附。特劫於威強服耳。名
雖為霸。實失天下心。今大王誠能反其道。任
天下武勇。何所不誅。以天下城邑封功臣。何

所不服。以義兵從思東歸之士。何所不散。於諸侯約。大王當王關中。今大王舉而東。三秦可傳檄而定也。於是漢王喜。自以為得信。晚遂聽信計。

文帝時。匈奴大入邊。詔將軍周亞夫屯細柳。劉禮次霸上。徐厲次棘門。上自勞軍。至霸上及棘門軍。馳直入。大將以下騎送迎。已而之細柳。不得入。先驅曰。天子且至。軍門都尉曰。軍中聞將軍令。不聞天子詔。帝乃使使持節。

詔將軍周亞夫。乃傳言開壁門。壁門吏士請車騎曰。將軍約。軍中不得驅馳。帝乃按轡徐行。亞夫持兵揖曰。甲冑之士不拜。請以軍禮見。帝為改容。成禮而去。羣臣皆驚。帝曰。嗟乎。此真將軍矣。曩者霸上棘門軍。兒戲耳。其將固可罷也。至於亞夫。可得而犯耶。稱善者久之。遂拜亞夫為中尉。

宣帝初。遣義渠安國伐諸羌。諸羌怒。犯塞攻城邑。殺長吏。安國以聞。時趙充國年七十餘。

帝老之。使問誰可將者。充國對曰。無踰老臣。
帝遣問曰。將軍度羌虜何如。當用幾人。充國
曰。百聞不如一見。兵難遙度。願至金城。圖上
方略。既至金城。帝賜書曰。皇帝問後將軍。甚
苦暴露。計欲宿留于進。借使虜知此意。或寇
或匿。寧有利哉。將軍不念國中之費。欲以歲
數而勝微。謂歷年乃勝小敵也將軍誰不樂此者。今詔
破羌將軍武賢等將兵二千人。以七月
北行。擊罕羌將軍。其引兵便道西並進。使虜

聞東方南方兵並來。分散其心意。當有瓦解者。今五星出東方。中國大利。蠻夷大敗。太白出高。用兵深入。敢戰者吉。弗敢戰者凶。將軍急裝。因天時。誅不義。萬下必全。勿復有疑。已又屢書令充國熟計其便。復奏。充國乃奏。願罷騎兵。留步兵萬餘屯田。條不出兵留田便宜十二事。奏每上。輒下公卿議。初是其計者什三。中什五。最後什八。魏相任其計可必用。帝從之。朞年諸羌悉平。

光武以赤眉延岑暴亂三輔郡縣乃遣馮異討之。車駕遂至洛陽。賜以乘輿及七尺具劔。勅異曰。三輔遭王莽更始之亂。重以赤眉延岑之酷。元元塗炭。無所依訴。今之征伐。非必畧地屠城。要在平定安集之耳。諸將非不健闘。然好虜掠。卿能御吏士。令自修飭。無為郡縣苦。異頓首受命。所至皆布威信。羣盜悉降。○帝討公孫述。命吳漢進軍攻廣都。拔之。帝戒漢曰。成都十餘萬衆。不可輕也。但堅據廣

都待其來攻。勿與爭鋒。若不敢來。公轉營迫之。須其力疲。乃可擊也。漢乘利。遂自將步騎二萬餘。進逼成都。去城十餘里。阻江北為營。作浮橋。使副將劉尚將萬餘人屯於江南。相去二十餘里。帝聞大驚。使讓漢曰。公既輕敵深入。又與尚別營。事有緩急。不復相及。賊若出兵綴公。而大衆攻尚。尚破。公即敗矣。急引兵還廣都。詔書未到。述果使其將謝豐。袁吉攻漢。使別將攻尚。漢敗入壁。豐圍之。漢乃率

諸將夜銜枚引兵與尚軍合。豐等不覺。悉兵迎戰。自晨至晡。遂大破之。斬謝豐。表吉。自是八戰八剋。蜀乃平。

晉武帝時。涼州羌叛。河西斷絕。帝臨朝嘆曰。誰能為我討此虜。通涼州者乎。朝臣莫對。馬隆前曰。陛下能任臣。臣能平之。帝曰。必能滅賊。何為不任卿。顧卿方畧。何如耳。隆曰。陛下若能任臣。當聽臣自任。臣請募勇士三千人。無問所從來。率之鼓行而西。稟陛下威靈。醜虜

何足滅哉。帝許之。公卿僉曰：隆小將，妄說，不可從也。帝弗納。卒用隆。隆果攻殺諸羗，遣使回報。帝撫掌歡笑，召羣臣謂曰：若從諸卿言，是無秦涼也。

唐高祖既定京師，以李靖初不附已，將殺之。靖呼曰：公起兵為天下除暴亂，欲就大事，奈何以私怨殺謫士乎？遂釋而用之。開州蠻冉肇則寇夔州，靖率兵八百破其屯，要險設伏，斬肇，則俘禽五千。帝謂左右曰：使功不如使過。

靖果然因手勅勞曰。既往不欲。向事吾已久。忘之矣。靖遂為大將。屢立功。

太宗貞觀八年。吐谷渾寇涼州。命李靖為西海道行軍大總管。帥諸軍往討之。帝誡靖曰。吐谷渾妄自矜大。失藩臣之禮。數為草竊侵我邊陲。是行也。以寡制衆。良在不疑。然敵不可輕。寇不可玩。間外之事。將軍裁之。制變應機。不可預筭。官賞罪罰。並在此行。當思自勉。肅宗時。安慶緒弑祿山。繼為亂。帝命天下兵。

馬都元帥廣平王俶司空天下兵馬副元帥
郭子儀帥諸將佐往討之初帝勞饗諸將謂
子儀曰事之濟否在此行也子儀曰此行不
捷臣必死之於是俶將朔方諸軍及回紇之
衆與子儀大敗賊於長安既定西京已而復
與賊戰於新店大敗之東京亦定焉

代宗時僕固懷恩叛帝問郭子儀計所出子
儀曰無能為也懷恩本臣偏將雖慄悍然素
失士心其脅為亂者又皆臣故部曲素以恩

信結之。彼忍以刃相向乎。帝曰善。遂遣子儀擊敗之。

宋太祖命曹彬伐江南主李煜。戒以勿暴虐生民。務廣威信。待其自歸。不須急擊。取匣劍授彬曰。不用命者。副將以下皆斬之。潘美以下皆失色。自王全斌伐蜀多殺人。帝每恨之。彬性仁厚。故專任焉。彬將行。又戒之曰。城陷之日。慎無殺戮。設若困鬪。則煜一門不可加害。及彬克昇州。得煜以歸。帝御明德門。見煜于

樓下不用獻俘儀○帝以郭進為澤潞防禦使充西山巡檢進有材幹御下嚴毅在西山嘗有軍校詣闕誣進者太祖謂左右曰彼有過畏罰故誣進求免爾遣使送與進令殺之會并人入寇進謂誣者曰汝敢論我信有膽氣今捨汝罪汝能掩殺并寇即薦汝於朝如敗可自投河水其人喜躍聽命果致克捷進即以聞乞遷其職太祖從之○帝遣潘美伐南漢主劉鋹美進兵薄城下漢主懼美遣人

論以帝意以為能戰則戰不能戰則守不能
守則降不能降則死不能死則亡此五者惟
所行之他不敢問也漢主不果降卒被擒而
歸○帝征太原過彰德時韓重贄為節度使
迎帝帝宴之曰契丹知我是行必率眾來援
彼意鎮定無備必由此入卿可領兵倍道而
進出其不意破之遂命重贄為北面都部署
夜發果遇契丹兵于定州重贄大破其眾
高宗時兀术入寇韓世忠戰走之詔曰世忠

蕩平諸寇。連奏大捷。已加優擢。其告諸統制
官。各務立功報國。共濟中興。以光史冊。已而
兀術與劉豫合兵復至。帝以御札賜世忠。畧
曰。虜氣正銳。朕甚憂之。朕雖不德。無以君國
子民。而祖宗德澤。猶在人心。所宜深念累朝
涵養之恩。永垂千載忠義之烈。世忠讀詔。感
泣。遂自鎮江進屯揚州。以禦之。○帝命岳飛
收復襄陽。遂詔監司帥守。餉軍無闕。庶幾必
濟。飛等進軍。與金兵戰。大破之。遂復襄陽。及

郢隨諸州軍聲大振。帝尋命飛為宣撫使。扈駕至建康。以劉光世所統王德、鄺瓊等兵五萬餘隸飛。且詔德曰：「聽飛號令如朕親行。」飛連上疏，反復極論恢復。帝賜報曰：「覽卿近奏，銳然以恢復為請，豈天實啓之以輔成朕志。行遂中興也。」飛由是率屬將士將大舉，會秦檜主和議，忌其成功，乃沮其志。

元世祖大舉伐宋，以伯顏領河南等路行中書省，所屬兼聽節制。及陞辭，世祖諭之曰：「昔曹

彬以不嗜殺平江南。汝其體朕心為吾曹彬可也。○至元十八年正月。命行省右丞相阿剌罕。右丞范文虎及忻都。洪茶丘等率十萬人征日本。二月。諸將陞辭。世祖勅曰。始因彼國使來。故朝廷亦遣使往。彼遂留我使不還。故使卿輩為此。朕聞漢人言。取人家國。欲得百姓土地。若盡殺百姓。徒得地何用。又有一事。朕甚憂之。恐卿輩不和耳。假言彼國人至。與卿輩有所議。當同心協謀。如出一口。答之。

○盜起雲南。號數十萬。聲言欲寇成都。時立智理威為嘉定路達魯花赤。馳入告急。言辭懇切。繼以泣涕。大臣疑其不然。帝曰。雲南朕所經理。未可忽也。乃推食以勞之。又語立智理威曰。南人生長亂離。豈不厭兵畏禍邪。御之乖方。保之不以其道。故為亂耳。歸以朕意告諸將。叛則討之。服則捨之。毋多殺以傷生。意則人必定矣。

國朝甲辰八月。平章常遇春兵至贛州。熊天瑞

固守不下。

太祖皇帝令平章彭時中以兵會遇春等共擊之。又命中書右司郎中汪廣洋往叅謀遇春軍事。諭廣洋曰。汝至贛。如城未下。可與遇春等言。熊天瑞困處孤城。猶籠禽阱獸。豈能逃逸。但恐破城之日。殺傷過多。要當以保全生民為心。一則可為國家用。一則可為未附者勸。且如漢將鄧禹。不妄誅殺。得享高爵。子孫昌盛。此可為法。向者鄱陽湖之戰。陳友諒既

敗生降其兵。至今為我用。縱有逃歸者。亦我之民。我前克湖廣。禁軍士毋入城。故能全一郡之民。苟得郡無民。何益。廣洋至。顓見遇春等傳。

太祖命時天瑞拒守益堅。遇春乃浚濠立柵以困之。未幾城降。○乙巳八月。命中書左相國徐達為大將軍。平章常遇春為副將軍。帥師二十萬伐張士誠。集將佐諭之曰。自大亂以來。豪傑並起。所在割據。稱名號者不可勝數。

江南亂雄。西有陳友諒。東有張士誠。皆連地
千里。擁衆數十萬。吾介乎二人之間。相與抗
者十餘年。觀二人所為。其志豈在於民。不過
貪富貴。聚淵藪。劫奪寇攘而已。友諒敗滅。獨
士誠據有浙西北。連兩淮。恃其疆力。數侵吾
之疆場。賴諸將連歲征討。克取兩淮之地。今
惟浙西姑蘇諸郡未下。故命卿等討之。卿等
宜戒飭士卒。毋肆虜掠。毋妄殺戮。毋發丘壠。
毋毀廬舍。聞張士誠母葬姑蘇城外。慎勿侵

毀其墓。汝等毋忘吾言。諸將帥務在輯睦。勿縱左右欺凌軍士。凡為將之功。必資士卒。善撫恤之。大抵克敵者。必以成功為效。樹德者。必以廣恩為務。卿等勉之。諸將皆再拜受命。

○吳元年十月。命徐達為征虜大將軍。常遇春為征虜副將軍。率甲士二十五萬。由長淮入大河北。取中原。胡廷瑞為征南將軍。何文輝為副將軍。率吉安寧國南昌袁贛滁和無為等衛軍。由江西取福建。以湖廣叅政戴德

隨征湖廣平章楊璟左丞周德興叅政張彬率武昌荊州益陽常德潭岳衡澧等衛軍取廣西召諸將諭之曰征伐所以奉天命平禍亂安生民故命將出師必在得人今諸將非不健闘然能持重師有紀律戰勝攻取得為將之體者莫如大將軍達當百萬之衆勇敢先登摧鋒陷陣所向披靡莫如副將軍遇春然吾不患遇春不能戰但患其輕敵耳吾前在武昌親見遇春纔遇數騎挑戰即輕身赴

之。彼陳氏如張定邊者。何足稱數。尚據城指揮。遇春為大將。顧與小校爭能。甚非所望。切宜戒之。若臨大敵。遇春須領前鋒。或敵勢彊。則遇春與叅將馮宗異分為左右翼。各將精銳以擊之。左丞薛顯。叅政傅友德皆勇略冠諸軍。可各領一軍。使當一面。或有孤城小敵。但遣一將有膽略者。付以總制之權。皆可成功。達則專主中軍。策勵羣帥。運籌決勝。不可輕動。古云。將在軍。君不與者。勝。汝等其識之。

又謂達曰。閭外之事。汝實任之。茲行必自山東次第進取。山東古云十二山河之地。師行之際。須嚴部伍。明分數。一衆心。審進退之機。適通變之宜。使戰必勝。攻必取。我虛而彼實。則避之。我實而彼虛。則擊之。將者三軍之司命。立威者。勝任勢者。彊。威立則士用命。勢重則敵不敢犯。吾嘗與諸豪傑並驅。觀其取敗者。未有不由威不立而勢輕也。汝其慎之。諭友德曰。此行汝當努力。昔漢高祖與項羽爭。

衡彭越宣力於山東。今用師自山東始。汝其勉之。諭廷瑞曰。汝以陳氏丞相來歸。事吾數年。忠實無過。故命汝總兵往取福建。何文輝為爾之副。湖廣叅政戴德從汝調發。二人皆吾親近之人。勿以此故廢軍政。凡號令征戰。一以軍法從事。吾昔微時在行伍中。見將帥統御無法。心竊鄙之。及後握兵權。所領一軍皆新附之士。一日驅之野戰。有二人犯令。即斬以徇衆。皆股栗莫敢違吾節度。人能立志。

何事不可為。聞汝往年嘗攻閩中。必深知其
地里險易。今總大軍進征。凡攻圍城邑。必擇
便利可否為之進退。無失機宜。克定之功。全
賴於汝。於是達等拜命辭出。○洪武元年
七月。

太祖將發汴梁。大將軍徐達等自陳橋入辭。乃
諭之曰。朕與公等率衆渡江。誓除禍亂。以安
天下。今士卒舍父母妻子。戰鬪於矢石之間。
百死一生。久未休息。朕每念之。惕然于心。然

非得已也。中原之民久為羣雄所苦。死亡流
離徧于道路。天監在茲。朕不敢怠。故命爾等
帥師北征。廓清中原。拯民艱苦。昔元起沙漠。
其祖宗有德。天命入主中國。將及百年。今其
子孫怠荒。罔卹民艱。天厭棄之。君則有罪。民
復何辜。前代革命之際。兵戈相加。視如仇讎。
肆行屠戮。違天虐民。朕實不忍。爾諸將帥當
以為戒。克城之日。毋虜掠。毋焚蕩。毋妄殺人。
必使市不易肆。民安其生。凡元之宗戚皆善。

待之庶幾上荅天心。下慰人望。以成朕伐罪救民之志。有不恭命者。必罰無赦。諸將皆感激拜辭而行。

永樂四年七月。

太宗皇帝命成國公朱能等征討安南黎賊。臨遣諭之曰。前安南王陳日燿在我

太祖皇帝時。率先歸順。恭脩職貢。始終一誠。我國家亦待以優禮。安南之人皆受其福。日燿死。其後王為賊臣黎季犛所弑。篡奪其位。僭

稱大號殺陳氏子孫殆盡放兵四劫攻擾占
城侵我邊境邀殺朝使傷害官軍而暴征橫
賦虐其國人國人怨之深入骨髓

天地鬼神皆所不容朕恭天之命子育萬方不
敢不正特遣爾等率師弔伐夫安南之人皆
朕赤子今其勢如在倒懸汝往當如救焚拯
溺不可緩也惟黎賊父子及其同惡在所必
獲其脅從及無辜者必釋爾宜深體朕心毋
養亂毋玩寇毋毀廬墓毋害稼穡毋恣取貨

財。母掠人妻女。母殺戮降附。有一於此。雖有功。不宥。爾其慎之。母冒險肆行。母貪利輕進。其愛恤士卒。堅利甲兵。本之以敬慎。載之以智勇。爾其勉之。罪人既得。即擇陳氏子孫之賢者立之。使撫治一方。然後還師。其往勉之。能等頓首受命。復遣使齎勅諭西平侯沐晟曰。昔爾父事我。

皇考。累效勞勤。撫西域定雲南。功績偉然。既沒之後。越等追封爾兄弟繼龍侯爵。爾受一方。

之寄者數年。邊境安輯。良有可嘉。然丈夫貴自立功烈。今命爾為左副將軍。副總兵官。成國公朱能征討安南黎賊。爾當勉盡忠勤。和以輯事。建非常之功。以光先人。以啓後嗣。爾其懋哉。夫智信仁勇。嚴為將之道也。畏懦則債事。委瑣則罔功。必務深遠之謀。毋徇目前之見。毋驕于小得。必戒于私暱。則有以稱朕之委任。爾宜懋哉。

馭夷

周宣王時玁狁內侵逼近京邑。命尹吉甫帥師伐之。故詩人詠之曰。薄伐玁狁。至于太原。言逐出之而已。不窮追也。○淮南之夷為亂。乃命召穆公往平之。既平。詩人美之曰。江漢湯湯。武夫洸洸。經營四方。告成于王。四方既平。王國庶定。時靡有爭。王心載寧。

漢文帝未立時。南越王趙佗以漢數擊之不利。遂乘黃屋左纁。稱制數寇邊境。及帝即位。遣中大夫陸賈賜佗書有曰。聞王遺將軍隆慮。

侯書求親昆弟。請罷長沙兩將軍。朕以王書
罷將軍博陽侯。親昆弟在真定者。已遣人存
問。脩治先人家。前日聞王發兵於邊。為寇不
止。雖王之國。庸獨利乎。必多殺士卒。傷良將
吏。寡人之妻。孤人之子。獨人父母。得一亡十。
朕不忍為之也。且得王之地。不足以為大。得
王之財。不足以為富。朕嶺以南。王自治之。雖
然王之號為帝。兩帝並立。亡一乘之使以通
其道。是爭也。爭而不讓。仁者不為也。願與王

分棄前惡。通使如故。賈至越。佗恐頓首謝罪。
願奉明詔。長為藩臣。奉職貢。

武帝元狩二年。匈奴單于怒。渾邪休屠王為
漢所殺虜數萬人。欲召誅之。渾邪王與休屠
王恐。謀降漢。休屠王後悔。渾邪王殺之。并其
衆以降。帝乃分徙降者。邊五郡故塞外。因其
故俗。為五屬國。而金城河西。西並南山。至鹽
澤。空無匈奴。漢既得渾邪王地。隴西北地上
郡益少胡寇。詔減三郡戍卒之半。以寬天下。

之繇○帝以匈奴右賢王數侵擾朔方乃令車騎將軍衛青將三萬騎出高闕別遣將出朔方及右北平凡十餘萬人皆令屬青擊匈奴右賢王飲醉青等夜至圍之右賢王驚潰圍北去得裨王十餘人衆萬五千餘人畜數十百萬於是引兵還○帝以樓蘭王姑師攻劫漢使為匈奴耳目遣趙破奴擊之破奴以七百騎虜樓蘭王遂破車師因舉兵威以困烏孫大宛之屬封破奴浞野侯於是酒泉列

亭障至玉門矣

宣帝神爵二年。以鄭吉為西域都護。初吉以侍郎田渠黎。因發諸國兵。攻破車師。遷衛司馬。使護鄯善。以西南道。至是匈奴乖亂。日逐王先賢。揮音纏欲降漢。使人與吉相聞。吉發諸國兵五萬人迎之。將詣京師。時吉威震西域。遂并護車師。以西北道。故號都護。都護之置。自古始。於是中西域而立幕府。治烏壘城。去陽關二千七百餘里。督察烏孫康居等三

十六國動靜有變以聞漢之彌令班西域矣
○甘露三年帝幸甘泉郊泰畤匈奴呼韓邪
單于來朝賜以冠帶衣裳金璽盤綬玉具劔
佩弓矢祭戟安車鞍馬金錢衣被錦繡縠帛
絮禮畢使使者道單于先行宿長平帝還登
長平阪詔單于毋謁其羣臣皆得列觀及諸
蠻夷君長數萬咸迎於渭橋下來道陳帝登
渭橋咸稱萬歲單于就邸長安置酒建章宮
饗賜之二月遣歸國發邊郡士馬送出塞又

轉邊穀米前後三萬四千斛給之。單于請居
光祿塞下。有急保受降城。自是烏孫以西至
安息諸國近匈奴者咸尊漢矣。

光武建武九年。司徒掾班彪上言。今涼州部
皆有降羌。羌胡被髮左衽。與漢人雜處。習俗
既異。言語不通。數為小吏黠人所見。侵奪窮
恚。無聊故致反叛。舊制益州部置蠻夷騎都
尉。幽州部置領烏桓校尉。涼州部置護羌校
尉。皆持節領護。治其怨結。歲時巡行問所疾

苦。又數遣使譯。通導動靜。使塞外羗夷為吏耳目。州郡因此可得警備。今宜復如舊制。以明威防。帝從之。以牛邯為護羗校尉。○建武二十一年。莎車王賢浸以驕橫。欲兼并西域。數攻諸國。諸國愁懼。車師前王鄯善焉耆等十八國俱遣子入侍。願得都護。帝以中國初定。北邊未服。皆還其侍子。厚賞賜之。諸國聞都護不出。而侍子皆還。大憂恐。乃與燉煌太守檄願留侍子。以示莎車。言侍子見留。都護

尋至。箕且息其兵。裴遵以狀聞。帝許之。西域諸國侍子久留燉煌。皆愁思亡歸。莎車王賢知都護不出。擊破鄯善。攻殺龜茲王。鄯善王安上書。願復遣子入侍。更請都護。帝報曰。今使者大兵未能出。如諸國力不從心。東西南北自在也。○建武二十七年。北匈奴遣使詣武威求和。親帝召公卿廷議。不決。皇太子言曰。南單于新附。北虜懼於見伐。故傾耳而聽。爭欲歸義耳。今未能出兵而反交通北虜。臣

恐南單于將有二心。北虜降者且不復來矣。
帝然之。告武威太守勿受其使。臧官馬武上
書曰。虜今人畜疫死。旱蝗赤地。疲困乏力。不
當中國一郡。萬里死命。縣在陛下。豈宜固守
文德而墮武事乎。今命將臨塞。厚縣購賞。諭
告高句麗。烏桓。鮮卑。攻其左。發河西四郡天
水隴西羌胡。擊其右。如此。北虜之滅。不過數
年。詔報曰。今國無善政。災變不息。百姓驚惶。
人不自保。而復欲遠事邊外乎。且傳聞之事。

恒多失實。誠能舉天下之半以滅大寇。豈非至願。苟非其時。不如息民。自是諸將莫敢言兵事者。

安帝延光元年。詔高句麗遂成等桀逆無狀。當斬斷菹醢以示百姓。幸會赦令。乞罪請降。鮮卑濊貊連年寇鈔。驅略小民。動以千數。而我送數十百人。非向化之心也。自今已後。不與縣官戰鬪。而自以親附送生口者。皆與贖直。縑人四十匹。小口半之。

唐太宗貞觀初。頡利突利二可汗大舉入寇。進至渭水。便橋之北。帝與房玄齡等六騎徑詣渭水上。與頡利隔水語。責以負約。突厥大驚。皆下馬羅拜。俄而諸軍繼至。旌甲蔽野。帝麾軍使却而布陣。獨留與語久之。突厥懼而請和。受盟而去。○三年冬。代州都督張公謹上言。突厥可取之狀。帝乃命李靖為定襄道行軍總管。統諸軍討之。十二月。突厥突利可汗入朝。帝曰。往者太上皇以百姓之故。稱臣於

突厥朕常痛心焉。今單于稽顙庶幾可雪前恥矣。昔人謂禦戎無上策。能安撫中國而四夷自服。豈非上策乎。○四年春。李靖自馬邑進。夜襲頡利于定襄。破之。李世勣出雲中戰于白道。亦大破之。頡利既敗。竄于鐵山。遣執失思力入見謝罪。求朝。帝遣鴻臚卿唐儉等慰撫之。又詔李靖將兵迎之。頡利外為卑辭。內實猶豫。謀走磧北。靖引兵與世勣會。謀曰。頡利雖敗。其衆猶盛。若走度磧北。則難圖矣。

今詔使至彼。虜必自寬。若選萬騎。罷之。不戰可擒矣。遂勒兵夜發。世勳繼之。頡利見儉來大喜。靖前鋒去牙帳七里。頡利始知之。乘千里馬先走。其衆遂潰。斬首萬餘級。俘男女十餘萬。世勳軍磧口。酋長皆率衆降。頡利及族人思摩往依沙鉢羅設。蘇尼失。蘇尼失執頡利等。舉衆來降。漠南遂空。帝御樓受俘。館之太僕。上皇聞之。歎曰。漢高祖困白登。不能報。今我子能滅突厥。吾付託得人。復何憂哉。帝

詔羣臣議區處突厥降衆。朝士言多不合。溫
彥博請準漢建武故事。置於塞下。順其土俗。
以實空虛之地。使爲中國扞敵。帝用彥博策。
東自幽州。西至靈州。分突利故地爲四州。又
分頡利之地爲六州。左置定襄。右置雲中。二
都督府以統其衆。以突利爲順州都督。頡利
爲右衛大將軍。蘇尼失思摩皆封郡王。其餘
拜官有差。願入居長安者近萬家。○五年。康
國求內附。帝曰。前代帝王好招來絕域。以求

服遠之名。無益於用而糜弊百姓。今康國內
附。儻有急難。於義不得不救。師行萬里。豈不
疲勞。勞百姓以取虛名。朕不為也。遂不受。○
十七年。太常丞鄧素使高麗還。請於懷遠鎮
加戍兵。以逼高麗。帝謂之曰。遠方不至。則脩
文德以來之。未聞一二百戍卒能威絕域者
也。仁義忠信。不理於內。兵甲士卒。遠勞於外。
有國之深忌。朕所不取也。

宋真宗景德三年六月。知廣州凌策請發兵定

交趾亂。帝以黎桓素脩職貢。不欲伐。命遵前
詔安撫。七月。邵曄上邕州至交趾水陸路及
控制宣州山川等圖。帝曰。祖宗闢土廣大。唯
當慎守。不必貪無用地。苦勞兵力。

神宗時。范純仁為陝西轉運副使。召還。帝問
曰。卿在陝西久。主漕輓。必精意邊事。城郭甲
兵糧儲如何。對曰。城郭粗完。甲兵粗脩。糧儲
粗備。帝愕然曰。卿才能如此。朕所倚賴。而執
事皆言粗。何也。純仁徐對曰。粗者。未精之辭。

如是足矣。臣願陛下無深留意於邊事。恐邊臣觀望要功生事。結釁夷狄。殘害生靈。耗竭財用。糜費爵賞。不惟為今日眼前之害。又將貽他時意外之憂。願陛下究孟子交隣之道。修孔子來遠之德。洽于夷狄。彼將愛戴陛下。如父母。雖其首首桀驁。欲侵侮我疆。其徒亦不為之用也。帝納之。

元世祖中統元年。廉希憲為陝西宣撫使。言高麗國王嘗遣其世子俣入覲。會憲宗將兵攻

宋僊留三年不遣。今聞其父已死。若立僊遣歸國。彼必懷德於我。是不煩兵而得一國也。帝是其言。改館僊以兵衛送之。仍赦其境內。○征交趾失利。復謀大舉。不忽木曰。島夷詭詐。天威臨之。寧不震懼。獸窮則噬。勢使之然。今其子曰。燔龍位。若遣一介之使。諭以禍福。彼能悔過自新。則不煩兵而下矣。如或不悛。加兵未晚。帝從之。於是交趾感懼。遣其僞昭明王等詣闕謝罪。盡獻前六歲所當貢物。

國朝

太宗皇帝永樂初。西北諸胡來貢。命光祿卿賜食。既罷。禮部尚書李至剛進曰。西北諸胡。陛下撫綏皆已向化。邊境已寧。

太宗曰。人嘗言以不治治夷狄。夫好善惡惡。人情所同。豈間於華夷。撫之有道。未必不來。虎至暴擾之。能使馴帖。況虜亦飢食渴飲。具人心者。何不可馴哉。但有來者。推誠待之耳。

二十一年十月。

太宗皇帝北征駐蹕上莊堡寧陽侯陳懋為前鋒遇韃靼王也先土干率妻子部屬來歸懋以其部屬入見也先土干遙望天顏尚有懼色。

太宗命稍前與語遂備述誠悃久願來歸但為阿魯台等牽繫今幸見

陛下是天賜臣再生之日也。

太宗曰華夷本一家朕奉天命為天子天之所覆地之所載皆朕赤子豈有彼此爾今順天

道而來。君臣相與共享富貴。勿憂也。也。先土干及其部屬皆叩頭呼萬歲。命悉賜酒饌也。先土干退。謂所親曰。

大明皇帝真吾主也。舍此何適。

太宗諭文武羣臣曰。遠人來歸。宜有以旌異之。其封也。先土干為忠勇王。賜姓名曰金忠也。先土干之來歸也。其甥把台罕實贊之。遂授把台罕都督。俱賜冠帶及織金龍衣。遂賜宴。命金忠坐侯之下。伯之上。御前珍羞悉輟以

賜之宴罷御用金杯等物亦輟賜之於是左右皆贊美

上功德之盛。

太宗曰昔唐突厥頡利入朝太宗言胡越一家有矜大自得之意朕所不取惟天下之人皆遂其生邊境無虞兵甲不用斯朕志也

五倫書卷之二十一

五倫書卷之二十二

虞娥皇女英舜之二妃。帝堯之女也。舜在側微。四岳薦之於堯。堯乃妻之二女。以觀厥內。二女承事舜。不以天子之女故而驕盈怠嫚。思盡婦道。舜既嗣位。為天子。娥皇為后。女英為妃。天下稱二妃聰明貞仁。舜南巡崩於蒼梧。

二妃從之死於江湘之間。世稱湘君湘夫人。
周太姒有莘國之女。文王妃也。性貞淑。不貳其
操。已貴而能勤。已富而能儉。已長而敬不弛。
於師傅。已嫁而孝不衰。於父母。情欲之感。無
介乎容儀。宴私之意。不形乎動靜。時宮中之
人。見其有幽閑貞靜之德。故作關雎詩以美
之。言后妃之德如關雎。摯而有別。則性情之
正可見矣。

漢孝宣帝后許氏。初起微賤。及進尊位。其車從

甚節儉。五日一朝皇太后於長樂宮。親奉案上食。以婦道共養。帝加重焉。

馮昭儀。右將軍光祿勳奉世之女也。元帝時。自美人為婕妤。帝幸虎圈。鬪獸。後宮皆從。熊逸出圈。攀檻欲上殿。左右貴人傳昭儀等皆驚走。婕妤直當熊而立。左右格殺熊。帝問婕妤。人情皆驚懼。何故當熊對曰。妾聞猛獸得人而止。妾恐至御坐。故以身當之。帝嗟嘆。以此敬重焉。傳昭儀等皆慚。明年立為昭儀。

班婕妤左曹越騎況之女。賢才通辯。入後宮為婕妤。成帝遊於後庭。嘗欲與同輦。辭曰。觀古圖畫。賢聖之君。皆有名臣在側。三代末主。乃有女嬖。今欲同輦。得無似之乎。帝善其言而止。

平帝后王氏。莽之女也。婉淑有節行。帝即位。后年九歲。莽秉政。欲依霍光故事。以女配帝。后立歲餘。帝崩。後數年。莽篡位。后年十八。自劉氏廢。常稱疾不朝會。莽敬憚哀傷。欲嫁之。

令立國將軍孫建世子豫將醫往問疾。后大怒，鞭笞傍侍御，因廢疾不肯起。莽遂不敢疆及漢兵誅莽，燔燒未央。后曰：「何面目以見漢家？」自投火中而死。君子謂平后體自然貞淑之行，不為存亡改意，可謂節行不虧汙者矣。明德皇后馬氏，伏波將軍援之小女。明帝后也。章帝即位，尊為皇太后。建初元年，帝欲封諸舅，太后不聽。明年夏大旱，言事者以為不封外戚之故。有司因此上奏，宜依舊典。太后

詔曰有司奈何欲以馬氏比陰氏乎。吾豈可
上負先帝之旨。下虧先人之德。重嚴西京敗
亡之禍哉。固不許。廣平鉅鹿樂成王車騎朴
素。無金銀之飾。帝以白太后。太后即賜錢各
五百萬。於是內外從化。被服如一。

和熹皇后鄧氏。太傅禹之孫。和帝后也。能史
書。通詩論語。時有疾。特令后母兄弟入侍醫
藥。不限日數。后言於帝曰。宮禁至重。而使外
舍久在內省。上令陛下有幸私之譏。下使賤

妾獲不知足之謗。上下交損。誠不願也。帝曰。人皆以數入為榮。乃反以為憂。深自抑損。誠難及也。每有讌會。諸姬貴人競自脩整。后獨著素裝。服無飾。初為貴人時。其衣有與陰后同色者。即時解易。帝每有所問。常逡巡後對。不敢先。陰后言。帝知其勞。心曲體歎曰。脩德之勞。乃如是乎。

順烈皇后梁氏。大將軍商之女。順帝后也。少好書史。常以列女圖畫置于左右。以自監戒。

永建三年。選入掖庭。遂以為貴人。常被引御。從容辭於帝曰。夫陽以博施為德。陰以不專為義。螽斯則百福之所由興也。願陛下思雨露之均澤。識貫魚之次序。使小妾得免罪謗之累。由是帝加敬焉。陽嘉元年春。立為后。三國魏文昭皇后甄氏。文帝后也。后初為夫人時。太祖征關中。武宣皇后從留孟津。帝居守鄴。后以武宣皇后體少不安。不得定省。憂怖晝夜泣涕。左右驟以安問告。后猶不信。曰。夫

人在家故疾每動輒歷時今疾便差何速也
此欲慰我意耳憂愈甚及大軍還鄴后朝武
宣皇后望幄座悲喜感動左右武宣皇后見
后如此亦泣且曰新婦謂吾前病如昔時因
邪吾時小小耳十餘日即差因嗟嘆曰此真
孝婦也

晉文明皇后王氏魏中領軍蘭陵侯肅之女文
帝后也年八歲誦詩論尤善喪服苟有文義
目所一見必貫於心九歲遇母疾扶持不捨

左右衣不解帶者久之。既笄歸于文帝事舅姑盡婦道。及居父喪身不勝衣。言與淚俱。雖處尊位不忘素業。躬執紡績器服無文御浣濯之衣食不參味云。

唐文德皇后長孫氏太宗后也。喜圖傳視古善惡以自鑒。矜尚禮法。性約素。服御取給則止。益觀書。雖容擲不少廢。與帝言或及天下事。辭曰。牝雞司晨。家之窮也。帝固要之。訖不對。初后異母兄安業無行。父喪嘗逐后還外家。

后貴未嘗以為言。擢位將軍。後與李孝常等謀反。將誅。后叩頭曰。安業罪死無赦。然向遇妾不以慈。戶知之。今論如法。人必謂妾釋憾於兄。無乃為帝累乎。遂得減流越雋。一日后寢疾稍亟。太子欲請大赦。泛度道人。後塞。穴會。后曰。死生有命。非人力所支。若脩福可延。吾不為惡。使善無效。我尚何求。且赦令國家大事。佛老異方教耳。皆上所不為。豈宜以吾亂天下法。太子遂不敢奏云。

莊憲皇后王氏。順宗后也。性仁順。宮中化其德。莫不柔雅。又深抑外家。無毫絲假貸。訓厲內職。有古后妃風。

懿安皇后郭氏。汾陽王子儀之孫。憲宗后也。憲宗為廣陵王。聘以為妃。順宗以其家有大功烈。故禮之異諸婦。是生穆宗。元和元年。進冊貴妃。穆宗嗣位。上尊號皇太后。移御興慶宮。凡朔望三朝。帝率百官詣宮門為壽。帝升遐。中人有為后謀稱制者。后怒曰。吾效武氏。

耶。今太子雖幼。尚可選重德為輔。吾何與外事哉。敬宗立。號太皇太后。

宋章穆皇后郭氏。宣徽南院使守文第二女。真宗后也。后謙約。惠下性惡奢靡。族屬入謁禁中。服飾華侈。必加戒勅。有以家事求言於帝者。后終不許。兄子出嫁。以貧欲求恩賚。但出裝具給之。帝尤加禮重焉。

德妃楊氏。仁宗妃也。端麗機敏。善組紉書藝。一過目如素習。父忠為侍禁。仁宗欲加獎擢。

妃辭曰。外官當積勞以取貴。今以恩澤徼倖。恐啓左右諛謁之端。帝悅。命徙居肅儀殿。宣仁皇后高氏。英宗后也。神宗立。尊為皇太后。居寶慈宮。帝屢欲為高氏營大第。不許。元豐八年。帝不豫。浸劇。宰執王珪等入問疾。乞立延安郡王為皇太子。太后權同聽政。帝頷之。珪等見太后簾下。后泣撫王曰。兒孝順。自官家服藥。未嘗去左右。喜學書。已誦論語七卷。絕不好弄。乃令王簾外見珪等。是日降制。

立為皇太子。是為哲宗。哲宗嗣位。尊為太皇太后。驛召司馬光。呂公著未至。迎問今日設施所宜先。未及條上。已散遣修京城役夫。減皇城覘卒。出禁庭工伎。廢導洛司。出近侍尤無狀者。戒中外無苛斂。寬民間保馬戶事。由中旨。王珪等弗豫知。又起文彥博於既老。諭以復祖宗法度為先務。從父遵裕坐西征失律抵罪。蔡確欲獻諛以固位。乞復其官。后曰。遵裕靈武之役。塗炭百萬。先帝中夜得報。起

環榻行。徹旦不能寐。聖情自是驚悸。馴致大故。禍由遵裕得免刑誅。幸矣。先帝肉未冷。吾何敢顧私恩而違天下公議。確悚慄而止。有司請受冊寶於文德殿。后曰。母后當陽。非國家美事。況天子正衙。豈所當御。就崇政足矣。上元燈宴。后毋當入覲。止之曰。夫人登樓。上必加禮。是由吾故而越典制。於心殊不安。但令賜之燈燭。遂歲以為常。時宋用臣等既被斥。祈神宗乳媪入言之。冀得復用。后見其來。

曰。汝來得非爲用臣等遊說乎。且汝尚欲如曩日求內降。干撓國政耶。若復爾。吾即斬汝。媼大懼。不敢出一言。自是內降遂絕。力行故事。抑絕外家私恩。文思院奉上之物。無巨細。終身不取其一。臨政八年。朝廷清明。華夏綏定。人。以爲女中堯舜。

成肅皇后謝氏。孝宗后也。性儉慈。減膳羊。每食必先以進御。服澣濯衣。有數年不易者。第淵。以后貴。授武翼郎。后嘗戒之曰。主上化行。

恭儉。吾亦躬服澣濯。爾宜崇謙抑。遠驕侈。

度宗全皇后。會稽人。理宗母慈憲夫人姪孫女也。略涉書史。幼從父昭孫知岳州。開慶初。秩滿歸。道潭州。時元兵入破全衡。永桂圍潭州。人有見神人衛城者。已而潭獨不下。逾年事平。至臨安。會太子議納妃。臣僚遂言全氏侍其父昭孫往返江湖。備嘗艱險。其處富貴。必能盡警戒相成之道。理宗以母慈憲故。乃詔后入宮。理宗問曰。爾父昭孫昔在寶佑間。

沒于王事。每念之。令人可哀。后對曰。妾父可念。淮湖之民尤可念也。理宗深異之。語大臣曰。全氏女言辭甚令宜配冢嫡以承祭祀。遂擇為皇太子妃。度宗立。冊為皇后。

元徽仁皇后弘吉剌氏。裕宗后。成宗母也。先是世祖出田獵。道渴。至一帳房。見一女子緝駝茸。世祖從覓馬湫。女子曰。馬湫有之。但我父母諸兄皆不在。我女子難以與汝。世祖欲去之。女子又曰。我獨居此。汝自來去。於理不宜。

我父母即歸。姑待之。須臾果歸。出漣飲。世祖世祖既去。嘆息曰。得此等女子為人家婦。豈不美耶。後與諸臣謀擇太子妃。世祖俱不允。有一老臣嘗知向者之言。且知其未許嫁。言于世祖。世祖大喜。遂納為太子妃。成宗即位。尊為皇太后云。

國朝

孝慈高皇后馬氏。

太祖高皇帝后也。自少貞靜端一。孝敬慈慧聰。

明出人意表。尤好詩書。恒以不逮事舅姑為恨。見

帝追慕悲傷。亦為之流涕。晨夕禱翟。後

帝拜謁奉先殿。每當祭。躬治膳羞。務盡誠敬。

仁孝皇后徐氏。中山武寧王之長女。

太宗皇帝后也。自幼貞靜純明。孝敬仁厚。王與

夫人言。此女天稟非常。宜以經史充其知識。

后於書一覽輒成誦。不忘。由是博通載籍。

太祖高皇帝一日召王問曰。知卿有賢女。朕第

四子氣質不凡。能以配焉。王拜稽首謝。洪武九年正月。冊為燕王妃。恭勤婦道。

孝慈高皇后深所愛重。嘗曰。燕王妃所行。足以儀範宮闈。又曰。此吾孝婦也。

高皇后崩。哀毀動左右。執喪三年。蔬食如禮。免喪。或語及。未嘗不流涕云。

內助

周太姜。有呂氏之女。太王妃也。生太伯。仲雍。王季。太姜性貞順。率道靡有過失。太王謀事。遷

徙必與太姜俱焉

太任。文王之母。太姒。文王之妃。俱有聖德。故詩人美文王而推本言之曰。思齊太任。文王之母。思媚周姜。京室之婦。太姒嗣徽音。則百斯男。蓋言上有聖母。所以成之者遠。內有賢妃。所以助之者深也。

姜后者。齊侯之女。宣王后也。賢而有德。宣王常晏視朝。姜后脫簪珥。待罪於永巷。使其傅母通言於王曰。妾之不才。至使君王晏朝。敢

請罪。王曰。寡人不德。寔自生過。非夫人之罪也。遂復姜后而勤於政事。早朝晏退。卒成中興之名。

漢明德皇后馬氏。明帝在御。楚獄連年不斷。囚相證引。坐繫者甚衆。后慮其多濫。乘間言及惻然。帝感悟。多所降宥。每於侍執之際。轉言及政事。尤多毗補。而未嘗以家私干欲。寵敬日隆。始終無衰。

和熹皇后鄧氏。和帝永元八年冬。入掖庭。為

貴人時年十六。知典籍。承事陰后。夙夜兢惕。會陰后以巫蠱事廢。后請救不能得。帝便屬意焉。后愈稱疾。篤深自閉絕。會有司奏建長秋宮。遂立為皇后。是時方國貢獻。競求珍麗之物。自后立。悉令禁絕。歲時但供紙墨而已。晉文明皇后王氏。文帝知鍾會有才能。深見寵任。后言於帝曰。會見利忘義。好為事端。寵遇過必亂。不可大任。會後果反。武帝受禪。尊為皇太后。

唐太穆皇后竇氏。周上柱國毅之女。高祖后也。高祖在煬帝時。多畜善馬。后見曰。上性樂此。盍以獻。徒留之。速罪無益也。不聽。頃果坐譴。帝見隋政亂。多妄誅殛。乃為自安計。數奏鷹犬異駒。煬帝喜。擢位將軍。因泣謂諸子曰。早用而毋言。得此久矣。帝有天下。詔即所葬園。為壽安陵。謚曰穆。及祔獻陵。尊為太穆皇后。文德皇后長孫氏。兄無忌。於太宗本布衣交。以佐命為元功。出入臥內。帝將引以輔政。后

固謂不可。乘間曰：妾託體紫宮，尊貴已極，不願私親更據權于朝。漢之呂霍，可以為誡。帝不聽，自用無忌。為尚書僕射，后密諭令牢讓。帝不獲已，乃聽。后喜見顏色。一日從幸九成宮，方屬疾。會裴紹等急變，聞帝甲而起。后輿以從。官司諫止。后曰：上震驚，吾可自安。及疾大漸，與帝訣。時房玄齡小，譴就第。后曰：玄齡久事陛下，預奇計秘謀，非大故，願勿置也。又請帝納忠容諫，勿受讒省遊畋作役，死無恨。

也

賢妃徐氏。太宗妃也。生五月能言。四歲通論語詩。八歲自曉屬文。父孝德試使擬離騷為小山篇。曰。仰幽巖而流盼。撫桂枝以凝想。將千齡兮此遇。荃何為兮獨往。孝德大驚。太宗聞之。召為才人。遷充容。貞觀末。數調兵討定四夷。稍稍治宮室。百姓勞怨。上疏極諫。且言東戍遼海。西討崑丘。士馬罷耗。漕饟漂沒。捐有盡之農。趨無窮之壑。圖未獲之衆。喪已成

之軍。故地廣者非常安之術。人勞者為易亂之符也。又言伎巧為喪國之斧斤。珠玉為蕩心之酖毒。侈麗纖美。不可以不遏。志驕於業泰。體逸於時安。其剴切精詣。大畧如此。帝善其言。優賜之。帝升遐。哀慕成疾。不肯進藥。曰。帝遇我厚。得先殉馬侍園寢。吾志也。永徽元年卒。贈賢妃。陪葬昭陵石室。

宋章獻皇后劉氏。虎捷都指揮使嘉州刺史通。第二女也。真宗即位。入為美人。進德妃。章穆

皇后崩。帝立為后。性警悟。曉書史。聞朝廷事。能記其本末。帝退朝。閱天下封奏。多至中夜。后皆預聞。宮闈事有問。輒傳引故實以對。帝甚重之。

遼太祖皇后述律氏。簡重果斷。有雄略。時幽州劉守光遣韓延徽求援。不拜。太祖怒。留之。使牧馬。后曰。守節不屈。賢者也。宜禮用之。太祖乃召延徽與語。大悅。時吳主李昇獻猛火油。以水沃之。愈熾。太祖選三萬騎以攻幽州。后

曰。豈有試油而攻人國者。指帳前樹曰。無皮
可以生乎。太祖曰。不可。后曰。幽州之有土有
民。亦猶是耳。吾以三千騎掠其四野。不數年
困而歸我矣。何必為此。萬一不勝。為中國笑。
吾部落不亦解體乎。

金徒單皇后。廢帝后也。帝謂侍臣曰。昨太子生
日。皇后獻朕一物。大是珍異。卿試觀之。即出
諸絳囊中。乃田家稼穡圖。后意太子生深宮
之中。不知民間稼穡之艱難。故以為獻。朕甚

賢之

元昭睿皇后弘吉刺氏。濟寧忠武王按陳之女。世祖后也。性明敏。達於事機。國家初政。左右匡弼。與有力焉。一日。四怯薛官奏割京城外近地牧馬。帝既允。方以圖進。后至帝前將諫。先陽責太保劉秉忠曰。汝漢人聰明者。言則帝聽。汝何為不諫。向初到定都時。若以地牧馬。則可。今軍民俱分業已定。奪之可乎。帝默然。命寢其事。至元十三年。平宋。幼主朝于上。

都大宴。衆皆歡甚。唯后不樂。帝曰：「我今平江南。自此不用兵甲。衆人皆喜。爾獨不樂。何耶？」后跪奏曰：「妾聞自古無千歲之國。母使吾子孫及此。則幸矣。帝以宋府庫故物各聚置殿庭上。召后視之。后徧視即去。帝遣宦者追問。后欲何所取。后曰：「宋人貯蓄以遺子孫。子孫不能守而歸於我。我忍取一物耶？」

國朝

孝慈高皇后馬氏從

太祖在軍時。歲大歉。常自忍饑。懷糗餌。脯脩供。帝未嘗乏絕。遣次顛沛。恪遵婦道。

帝每有識記書札。輒命

后藏之。倉卒取視。

后即於囊中出而進之。未嘗脫誤。

帝嘗焚香祝天。願天命早有所付。毋苦天下生民。

后謂

帝曰。方今豪傑並爭。雖未知天命所歸。以妾觀

之。惟以不殺人為本。顛者扶之。危者救之。收
集人心。人心所歸。即天命所在。彼縱殺掠以
失人心。天命之所惡。雖其身亦難保也。

帝曰。爾言深合我意。明日冒雨歸。語

后曰。昨聞爾言。往來方寸間。不能忘。有一卒違
令。忽與婦人俱。詰之。不能隱。吐實云。掠得之。
我告之曰。今日用兵。所以禁亂。若寡人之妻。
孤人之子。適以生亂。不即捨之。吾必戮爾。此
卒感悟。遂即捨之。由爾言也。

后曰。用心如此。何憂人心之不歸乎。

帝帥師渡江。

后亦率諸將士妻妾繼至太平。及居建康時。吳漢接境戰無虛日。親率妾媵完緝衣襪。助給將士。夜分不寐。時時左右。

帝規畫。動合事機。洪武元年春正月。

帝即位。冊為皇后。因謂侍臣曰。昔漢光武勞馮異曰。倉卒蕪羹。亭豆粥。滹沱河麥飯。厚意久不報。君臣之間。始終保全。朕念皇后起布衣。

同甘苦。嘗從朕在軍。倉卒自忍飢餓。懷糗餌食朕。比之豆粥麥飯。其困尤甚。昔唐太宗長孫皇后當隱太子構隙之際。內能盡孝。謹承諸妃消釋嫌猜。朕數為郭氏所疑。朕徃情不恤。將士或以服用為獻。

后先獻郭氏。慰悅其意。及欲危朕。后輒為彌縫。卒免於患。殆又難於長孫皇后者。朕或因服御詰怒小過。輒謂朕曰。主忘昔日之貧賤耶。朕復為惕然。家之良妻。猶國之良相。豈忍忘

之。罷朝。因以語

后。后曰。妾聞夫婦相保。易。君臣相保。難。且妾安敢比長孫皇后賢。但願陛下以堯舜為法耳。

后一日聞得元府庫輸其貨寶至京師。問

帝曰。得元府庫何物。

帝曰。寶貨耳。

后曰。元氏有此寶。何以不能守而失之。蓋貨財非可寶。抑帝王自有寶也。

帝曰。皇后之意。朕知之矣。但謂以得賢為寶耳。

后即拜謝曰。誠如聖言。妾每見人家產業厚則
驕至。時命至則逸生。家國不同。其理無二。人
之常情。所當深戒。妾與陛下同處窮約。今富
貴至此。恒恐驕縱生於奢侈。危亡起於忽微。
故世傳伎巧為喪國斧斤。珠玉為蕩心醎毒。
誠哉是言。但得賢才。朝夕啓沃。共保天下。即
大寶也。顯名萬世。即大寶也。而豈在於物乎。
帝曰善。

后嘗侍坐乾清宮。語及窮約時事。

帝曰。吾與爾跋涉艱難。備嘗辛苦。今日化家為國。無心所得。上感天地之德。祖宗之恩。然亦爾內助之功也。

后曰。陛下一念救民之心。格于皇天。天命眷之。祖宗祐之。妾何力之有。但願陛下不忘於窮約之時。而警戒於治安之日。妾亦不忘相從於患難。而謹飭於朝夕。則

天地祖宗非惟庇佑於今日。將為子孫無窮之福。

后嘗令女史誦小學書。注意聽之。既而奏曰。小學書言易曉事易行於人道無所不備。真聖人之教法。盍表章之。

帝曰。然。吾已令親王駙馬太學生咸講讀之矣。嘗遇水旱歲凶。

后進食。必間設麥飯野蔬。

帝因告以賑卹之事。

后曰。妾聞水旱無時。賑卹之有方。不如蓄積之先備。卒不幸有九年之水。七年之旱。將何法。

以賑之。

帝深以為然。

后嘗為

帝言。施恩欲溥徧。然亦有等差。衆庶日給。固有艱難。百官家在京者。其鄉里遠近不同。家貧富亦異。而俸入有限。慮或不給。艱難必甚。遇暑雨祁寒。輒形於嗟嘆。

帝感其意。每遣存問。周給之。近臣及諸奏事官。朝罷會食廷中。

后命中官取其飲食親嘗之滋味涼薄不旨奏
帝曰朝廷用天祿以養天下之賢故自奉欲其
薄養賢欲其豐今之典大身者不能輯其下
人惟奉上者甘旨羣臣飲食皆不得其味豈
陛下養賢之意乎

帝曰飲食之事朕不經心將謂羣臣皆得甘旨
豈意所司自分厚薄想羣臣欲言又難於啓
齒事雖甚微所係亦大皇后今日不言朕豈
知其如此亟召光祿卿徐興祖等切責之興

祖等皆慙服。

帝嘗臨太學祀先師孔子還。

后問曰太學生幾何。

帝曰數千。又問悉有家乎曰亦多有之。

后曰善理天下者以賢才為本今人才衆多深足為喜但生負廩食於太學而妻子無所仰給寧無所累於心乎。

帝即命月賜糧給其家以為常。

成穆貴妃孫氏父和卿母晁氏妃稟性賢淑。

年十八未聘。

太祖皇帝聞其有容德。詔納宮中。言行皆有禮法。如古昔賢女。

帝即位。冊為貴妃。位衆妃上。小心恭謹。於帝有警戒相成之助。佐

皇后以理治於內。宮壺雍肅。

仁孝。皇后徐氏當

太宗皇帝舉義靖內難。后所贊畫居多。

帝正大統。后正位中宮。愈益祗勤。數言南北戰

闕累年。兵民俱敝。宜與休息。又言帝堯施仁
自親族始。又言人材難得。昔湯武之佐伊尹
太公皆先代之人。況今日賢才皆

太祖皇帝所成望

陛下不以新舊為間。

帝悉見嘉納。一日

帝退朝晏。

后請其故。

帝曰。吏部選人每循資格。朕今日親拔二十餘

人為方岳為郡守。故不覺晏耳。

后曰。國之理亂。係於民之安否。民之安否。係於牧守之賢不肖。奈何悉用資格。任牧守哉。往古令制。有出衆之才。必有不次之擢。積年勞之多。亦有叙陞之典。二者並行。則士無枉才。官得實用。而治效可致。

帝然之。

五倫書卷之二十二